

廣東歷代詩僧簡介(十二)

慧光居士

今崑

今崑字山品，番禺人，族姓李，母奉慈氏甚謹，世亂寡居，度不能全，先遣其子往依天然禪師於小持船，供灑掃之役，自與其女依禪師之妹菴主來機，丁亥同脫白。崑少聰慧泛溢，不受羈繫，禪師嚴束之不能禁，數擯斥，涕泣塞檻不去，至使人拉之戶外，終日不食亦不捨。禪師察其誠復收爲執侍，始受具誨習禪定，穎悟出羣，不可測度。居雷峯與頓修漸公結茅閉關三年，出侍華首師翁。戊戌度嶺遊天台，住靈隱遍參諸方，禮繼起禪師，當機有省，付以大法，嗣濟宗。

送定公往怡山

秋色正搖落。君行多苦辛。野航違冷淥。旅館託何人。帶月過庾嶺。披星出劍津。明年寒食節。啼鳥莫傷神。

寄薛劍公

笠杖日蕭索。高吟魄轉清。捲簾望巖月。竟夕倚秋聲。世累隨時遣。神仙待晚成。西風山氣早。惆悵鍊橋情。

刈稻南畝柬諸子

衣食妨修道。躬耕嶺下陂。夏畦勞行者。秋穫倩沙彌。每得野中趣。都忘心所悲。故人如有假。莫惜慰相思。

閒居寄匡盧兄弟

老衲棲遲自不凡。烏藤拄杖布褊衫。塵沙靜去眼觀樹。風雨忽來身侍巖。行處澗苔紛屐跡。課時枝鳥下經函。山中兄弟如相憶。應爲燒燈禮佛銜。

遙題車明經紫芝洞

白鶴峯前居士奇。一經拋却學餐芝。焚香求道自朝夕。閉戶著書忘歲時。竹密定抽冬日筍。松高應結萬年枝。將期掛席論心事。先對西風寄所思。

陳顥菴先生讀山品詩絕句云：慧語自從禪定得。龍湫一鉢洗凡裾。微辭似謔梁芝五。應著宮袍爲讀書。(傳語伯鸞春色早。讀書應著錦宮袍。山品東梁芝五句)

今全

今全字目無，番禺人，族姓許，癸巳脫白受具。繼無方應公爲監院，當雷峯建置之始，會典直歲有功，至今稱之。

秋曉泛舟

曉逐輕舟出。烟村日未紅。垂條低古柳。殘葉散疏桐。篷捲初秋雨。山還太古風。海門生白浪。一棹水雲空。

夜泊白石憶英目居士

懶任扁舟泊。天涯寄此身。野烟侵薄夢。白石憶同人。九曲空流水。繁音隔世春。夜深寒欲至。鳴鶴一聲頻。

初夏病起同梵音公坐玉淵潭。

久病成疏懶。忘機日枕流。好花猶共嘯。春鳥尙能留。對坐宴危石。臨風足古丘。薄寒動歸思。前路水西頭。

過古安吊季叔行人見海公

夢斷圍棋秋復秋。堪憐屐齒折高丘。忽驚短棹魂遊處。空見長江水自流。漠漠關山懸北薊。濛濛烟雨鎖南州。好將往事超生死。莫向皇華憶舊遊。

陳顥菴先生讀目無詩絕句云：滿目江山故人少。目青居士最知音。思君不見天涯路。無限淒迷憶舊吟。

今應

今應字無方，番禺人，族姓許，己丑出世受具，繼旋菴湛公爲雷峯監院。慈忍謙遜，人皆樂爲之用。會修建殿宇、構榼飯甌空集，應密審尺寸、量材大小，然後指揮匠石，皆中繩度，無竹頭木

屑之遺，人服其能、殿之宏麗鞏固、應有力焉。惜工未竣、已西首矣。族多善士、出世爲大僧者尤多、皆其勸導云。

夏日訪友人館時途中聞警
偶自山中出。尋幽到藥欄。夕陽斜帶雨。林木易生寒。隔岸風烟異。孤筇去住難。移時即分手。江路水漫漫。

燈夕雨

微雨偶然至。朔風還復吹。夜深幽思遠。寒入瑣窗知。雪水烹新茗。燈花剪舊枝。何妨今夕興。共話月圓時。

中秋偶作

寒巖老去不知秋。水淺溪清亦自流。荒草獨留風力勁。黃花何喜客情愁。松間月出人探少。桐井寒深茗飲休。自與青山相對久。西堂鐘起未回頭。

元日漫題

春輝初試小樓西。暖日籠雲亦易低。谷鳥變聲知律轉。寒花弄色與人齊。窗含淑氣爐烟迥。簾捲東風野靄迷。山院曉來無別事。新詩吟就竹間題。

陳顛菴先生讀無方詩絕句云：漫漫江水隔風埃。航得因緣一葦來。彼岸檀伽吟望客。寒花都爲客情哀。

今鏡

今鏡字臺設，三水人，族姓李，年十七隨母出世，求天然禪師薙髮、稟具執侍丈室，自小持船靜室至訶林雷峯棲賢諸大刹，皆屬網維。鏡行解精妍，爲同門所重，事尼母尤孝，人比之陳尊宿云。丙申坐化，不及擔荷大法，時賢惜之。

送止言澹歸兩公先入棲賢
俱出烽烟外。深山隨所之。溪聲初洗耳。雪色動揚眉。草沒安禪穩。人稀乞食遲。茅茨寬結構。待我隔秋期。

秋夜獨步

靜夜寡儔侶。行行疏磬飄。素懷江月近。破衲晚風招。隨意惟殘夜。回頭是斷橋。因知天地內。萬籟一無聊。

送見一公還棲賢

約君投老是匡廬。金井埋頭願不虛。松未成陰歸計早。雪猶當路客途紆。休驚屋破藏冰柱。好借窗明讀梵書。行愛清冬風日美。白雲深處莫躊躇。

送萬賴公出嶺

霜天只有雁南飛。何事蒼涼又別離。今日共傷楊柳盡。明年遙憶杜鵑期。頻經野戍人多識。歷上重灘路較遲。一鉢自諳雲水冷。亂峯孤影獨行持。

陳顛菴先生讀臺設詩絕句云：儒書出發遵何道。佛亦何曾竟作難。尼母安禪安穩處。不吟風雪度關山。

今二

今二字一有、新會人、族姓陳、邑諸生、生平豪舉負大志、不肯小挫於人、人亦罕近之者。一見天禪師、即戰身皈命、苦求度脫。辛丑受具，往來匡廬丹霞，卒於清遠。

寄懷家揚

扶胥一室待南天。憐爾幽棲近海邊。雲影破簾窺皓月。江聲入樹散鳴蟬。漁翁夜起聞清咒。野鶴寒歸習定禪。翻憶去年風雨夕。笠瓢來趁賈人船。

陳顛菴先生讀一有詩絕句云：豪情原不畏風烟。皈命餘生亦有緣。志不昵人人亦遠。扣舷孤嘯暮江船。

今四

今四字人依、新會人、族姓張，原名聖睿、餽諸生、少攻咕嗶、埋頭雪案、其頸遂側。年三十餘出家禮縱堂禪師薙髮。丁酉皈華首老和尚受具，充記室，出爲海幢典客。時阿大師創建海幢、道法盛行，王臣士庶，軒車相望，卒能應酬不缺。及石鑑和尚分座棲賢，以監院副之，時值修建，酌盈劑虛，所需不匱、由其純一發爲敏練云。後以母老歸養。竟坐化於象嶺下。

與楊無見諸子初人羅浮路憩明月寺

久夢羅浮路。今朝信杖藜。泊舟明月見。俯首白雲迷。曲徑枯藤繞。奔流亂石低。仙靈肯遲我。踪跡鎖橋西。

夜入棲賢

夜入棲賢谷。心知招隱泉。長橋金井上。寒月玉潭邊。
歸計從今日。高風憶往年。松門猶半啓。待我一燈懸。
曉起望五老芙蓉諸勝。

送友人

幾年同採越山薇。此去天涯欲息機。黃菊滿籬人猶遠。
白雲當路雁同歸。秋風拄杖還登嶽。夜雨孤帆不釣磯。
雲水故交輕一別。暫時相失莫相違。

飛來峽

嶽僧行傍水雲間。七十青峯夾綠灣。好夢正懸三峽澗。
賞心先得二禺山。軒轅竹外低帆影。蕭寺碑前拂蘚斑。
更爲榴花尋五色。斷崖攀盡不知還。

陳顥菴先生讀人依詩絕句云：無窮婉隱費評量。偶與無妨摘句商。
黃菊滿籬人獨遠。天涯送客最神傷。

今湛

今湛字旋菴、三水人，族姓李，原名廷輔，髫齡發大心出世，住
雷峯隆興寺，聞天然禪師倡道訶林，與其徒達此藉本寺田畝室廬
，供諸十方，躬迎禪師作開山第一祖，時龍象雲集，寺故湫隘，
象無所容。湛發願行募，泥首擊柝，於闖闖者三年，前後殿閣巍
然鼎新，改名海雲，又範金鑄迦文觀史諸相，遂成寶坊。湛豐頤
廣額，貌類應真，忘己徇物，自少至老，無錙銖之蓄。至嚴事師
長，調攝四衆，尤緇流所罕觀。戊子登具，爲海雲海幢兩山都寺
，趺化於丁巳年，世壽六十五，僧臘三十，衆奉全身塔瘞本山南
園。

喜方楚卿孝廉入山

蒼烟野水接長林。喜見高人有遠心。仙舫不妨時到岸。
佛樓猶可晚供吟。清泉白石知何世。翠竹黃花意亦深。
坐久西峰明月上。共論鐘磬已沈沈。

篁村探梅

昔年曾探此溪梅。霜鬢猶能策杖來。我認斷橋尋舊主。
雲移疏影盡新栽。香風簇簇沈山閣。澗水冷冷繞石臺。
踏遍不辭歸路遠。斜陽穿破竹林隈。
陳顥菴先生讀旋菴詩絕句云：喜對高人寂坐恬。玄微有意韻同拈。
漫成翠竹黃花句。好贈尋幽方孝廉。

今印

今印字海發，順德人，族姓梁，原名瓊，字之佩，更名海發，爲
邑諸生，幼精帖括家言，家貧不樂進取，爲人戲構一藝，輒膺冠
軍，既自悔欺冒，聊復自試，遂冠群士。謂士一試不遇，即當摧
鋒折輻，豈能蘇而復上。丁酉秋闈不遇，徑衣方袍出嶺，至匡廬
皈天老人落髮受具，研究祖道，至於忘身。戊戌隨師還粵，頃復
返廬山、掌記室，確有所證入。天老人默知其機緣有在，遣參諸
方、至楚黃見天章和尚，一語遂契，付以大法，命居西堂。公風
骨稜稜，性方嚴而愛人無異於己，年三十未有室，誠古德再現也
。弟海岸後亦出世海幢。

將入匡廬留別諸同學

自昔無家受館餐。如今行脚不爲難。身如落葉東西泊。
心共浮雲淡泊安。芳草有情遮遠道。麻衣無淚別江干。
十年始醒溪山夢。陡覺辭君兩脇寒。

送劉長孺携家歸龍川

霍山山下是蓬廬。半課耕耘半讀書。彭澤還存三徑菊。
華陽歸去一巾車。落帆鷗鷺迎新侶。入里兒童指舊居。
池上故交零亂散。他時魂夢亦應疏。

陳顥菴先生讀海發詩絕句云：行脚東西落葉深。溪山詩夢十年尋。
楚黃尙有機緣在。不必匡廬戀舊吟。

(未完)